

E VAAI LE TAGATA LE TAGATA I LE TINO,

AE VAAI IEOVA I LE LOTO

I Sam 16:7

Otootoga

O le olaga lea tatou te soifua ai, e faigata i le tele o taimi ona faaleo mafatiaga e tauave e tina. Aua foi o i latou o lo o faamoemoe e pou iai tama ma aiga, o i latou e gafa ma le fatuaiga tausī, o i latou o pae ma auli o faafitauli e tutupu i totonu o aiga, i le va o tama ma fanau, i le va o fanau ma isi fanau, le va o aiga ma nuu aemaise ai le atunuu lautele.

Ua masani ai la tina i le faiva o le onosa’i, ua lava taoso ai foi, ua masani i le faiva o le lagolagosua e faamuamua ai a latou tane ma aiga, ua masani i le faiva o le fai-aulaga – i le ola foi ma le loto toa i faigata. Poo a ni aiga e ausage, a filiga tina, e tutulai mai fanau ma tane e avea ma taitai i faiganuu, malo ma ekalesia.

O lona uiga o le tele o taimi e faigofie ai ona nana mai i tagata le tatou loto mafatia, loto faanoanoa, loto nutimomoia o tina. Le lagona o le vaivai i le lē tagolima, i le saputu mai o faalavelave a aiga ma saogamea, o pili e tofogi o fanau i aoga, eletise, le vai. O ni isi o tina ua leai ni tāmā sa fai ma limataumatau, ua tuua aiga ona o le Malaga a le maliu –ua matutua foi fanau ma fai aiga –ua o ese ma aiga, o ni isi ua faavaivaia ona o o suiga faaonaponei ua aafia ai le fanau ma siosiomaga faaaloalo ma le tausī mamalu sa masani ai anamua – ua foliga mai ai ua tele naunau fita ua faafesagai ma lenei augatupulaga –E tauau ai lava ina fiu le tagata –

AE MANATUA PEA LE UPU A LE TUSI – AUA NEI FIU I LE FAI MEA LELEI –

O se tala malamalama le tala i le tauala mai ia Nafanua o le valoaga o le malo o Malietoa mai le lagi, lea na sunu’i ai le alafale o le talalelei i o tatou laufanua, lea ua tatou aeae ai nei i ma’a o malie ae oaoa i faleseu. Ua tatou malamalama foi i le tala ia Tafaiifa Salamasina, sa mafai ai ona nofo filemu Samoa i lana paeaiga; le faletua o Fauea, le tina o Puaseisei, o le uluai Samoa na tatalo i o tatou laueleele ina ua taunuu Ioane Viliamu i Sapapalii. Ua manino le tala i le atoga lau a tane ma tamaitai i le motu tele i Salafai –lea ua mau ai i la ta gagana le muagagana –*E au le inailau a tamaitai.*

Tusa lava poo le lelei o le nanaina o ou lagona mafatia – e pei lava o se ie i malae i le silafaga a le Atua – aua e silasila le tagata i fafo ae o le Atua e silafia loto.

O le a faatino e le mafutaga a tina se talafaatino –e faamalosiau ma avea ma lu’itau i tina uma faapea ma le ekalesia. Ia taunuu ai lo tatou faamoemoe ola o ia Keriso, ia tatou mafuta faatasi ma lo tatou Alii i se aso ma se taimi ua na atofaina mo tatou.

USI MAIA LE MAIMO A MA LE FAAFOFOGA!

Tagata o le tala & Nofoaga.

Tina o le mafutaga
tamaitai tausima'i pasi, (e mafai ona fesui ai tagata)
fomai o le fatu –
tamaitai o i le faletalavai - (e mafai ona fesui ai tagata)

Nofoaga 1 : faleaiga. Nofoaga 2 : Falema'i...

Vaaiga 1. *(Pa'o'o mai i totonu seevae tetee o ni tamaitai talavou e toalua, o loo afisi mai a la faatau. Tuu i lalo faatau ma faafesagai i le laulau o le faleaiga)*

Sina: Malo suga – oka se magaia o lou ofu.

Losa : E maua? *(Ata faamaela)* Faapega fo'i oe –makuai top keke lau style –

Sina : Matuai aira lava o sitairi a girls a ea? *(Popo faalelei i totonu lona lauulu. Se'i i fafo le faata mai lana ato ma fesili. Na e matamata i talafou anapo? E iai le fomai mai Americano lea na amata analeila ana siaki i le falemai i Motootua?)*

Losa : Ioe, oka se aulelei o le major a ea? E sa'o a'u e fai fua ana siaki o aso e lua, –nei ma taeao?

Sina : Ae ā! Fēfē ia oe, pei lava e leai se luato'a ma le faamatalaga mai o le foma'i. E feoloolo a'u, e ai-re luato'a. Si teine foi gale o kiaiga - ga sola le meaola gogofa ma le faafafige! Ae kalofa e ia oe mama-aga o se faku ga fai e se isi lou faku, pegei ua leva ona malepe, i le fai amio o le meaola ga lua ke gogofa.

Losa : Ioe pau lava le mea lea ou te onosa'i ai pea ona o si a'u fagau, leaga e leai sa'u galuega e tologi ai a la aoga ma le isi mau gasu –e oo loa kamaiki i le iugivesike o Samoa, alu loa le igikia e su'e le mea e ola ai –

Sina : O le mea e lelei ai, o lega lava e fai le lua makafale a ea?

Losa : ae a! A iloa e le faifeau kifiga a le alii lea e fai, e pa'u sa'o lava lava ma laga ekalesia –e! ia kuu ga kala ae ka o e siaki le paran pe a mai!

Sina : ka o!

Ulufafo tamaitai.

Vaaiga 2 – *potu faatalitali. E to'a ono tamaitai o lo o tutu i le laina e faatali le taimi e vaai ai le fomai o fatu. Itu tauagavale -Ulufale mai i totonu Sina ma Losa ma tutu i le i'u o le laina. Taumatau – Ulufale mai le Teine tausimai ma lana laupapa o iai le lisi o ma'i.)*

Teine tausima'i : (*siaki lana laupapa ma valaau leo tele*) Mili Sila?

Mili: (*Pupula faanoanoa, faano'uno'u*) Malie, ae a pe a faamuamua atu nai tina talavou ia, atonu e vave a latou siaki. Ne'i te'i ua umi se taimi ia te a'u le olomatua. Susu mai i luma nei lau susuga Losa. E lelei oe e te toaga e toleni ma e lelei lava le tausiga o oe e si ou toalua. Ou te vaai atu foi e fealofani lava si au fanau. Ou te iloa lava e leai se mea e faaletonu ai lou fatu.

Losa : e sa'o lelei lava oe, e lelei lava le tausiga o a'u e si o'u to'alua.

Tili : Kafefe ia pakua!

Losa : (*ia Tili*) Vaai ne'i maua e le faata le eleelea o lou loto. Faafetai lava Mili —o le a talia lau faaaloalo, e fetau tonu lava, o le la e faatali mai si o'u toalua, o lo o popole mai.

(Ua agai atu i le mea o lo o iai le teine tausimai pasi – ua faasino atu e le teine tausimai pasi le ie paepae tele/screen tele e tu ai i tua. Ua agai mai i talaane o le screen le alii fomai mai Amerika ma lulu lona ulu ma tilotilo i le screen. Ua nofo i lona nofoa ma matamamata i le ata o le pepa faata na aumai e le teine tausimai pasi. Ua tusi i lalo e le alii fomai le iuga o le suesuega. Ua faamau i lalo le vailaau e aoga mo le togafitiga o le ma'i. Ona tauaao lea i le ma'i. Ua faasino le ma'i i le laulau o lo o tusi ai le igoa TALAVAI. O lo o saofa'i ai ni tina se to'alua).

Talavai 1 : Aumai ia te a'u lau pepa tina!

Losa : Faafetai lava.

Talavai 1 : *faitau leo tele* Mare 11: 25, 26

Losa : oi, o a na ituaiga fualaau?

Talavai 1 : Tina, o fualaau mai le Fomai o Fomai. Mareko 11:25 “... ai se mea tou te tiga ai i se tasi, ia outou faamagaloina; ina ia faamagaloina foi e lo outou Tama i le lagi a outou agasala. Afai foi tou te le faamagaloina, e le faamagaloina e lo outou Tama i le lagi a outou agasala.” Afai o iai se isi o e tiga ai tina, e manaomia lava ona faamagalo ma e taumafai e faagalo!

Losa : Faafetai lava mo fualaau faapitoa. *Talotalo lona lima ma ulufafo.*

Tausimai pasi : Mili, e a, ua e sauni? (*Lue mai le ulu o Mili*). Aga'i atu i tua o le pupuni lea mo lau faata.

Mili : Ua lelei, a lailoa lava le ofisa mamalu.

Punou pea i ana faila le alii fomai. Ua lilo le tino o Mili i le pupuni ona tilotilo lea o le alii fomai i le pupuni mo sina taimi puupuu. Ua aumai i ai le pepa faata e le teine

tausimai pasi. Ua nofo le alii ma matamamata i le ata o le pepa faata. Ua tusi i lalo e le alii fomai le iuga o le suesuega. Ua faamau i lalo vailaau e aoga mo le togafitiga o le ma'i. Ona tauaao lea i le ma'i. Ua faasino le ma'i i le laulau o lo o tusi ai le igoa TALAVAI. O lo o saofafa'i ai ni tina.

Talavai 2 : Lau pepa tina! *Faitau le pepa e aunoa ma se leo. Siaki le tusi o lo o i lana laulau ma faitau. Sala 91:1 i le 7.*

Mili : Faamolemole lau susuga poo la'u pepa tala vai tonu lena na aumai e le Susuga a le alii fomai?

Talavai 2 : Aua e te popole, o lea lava e sa'o le fofo o le faafituali. E iai se isi o sauni e Malaga ese atu ma le aiga?

Mili : Ioe, o si au tama teine leoleo e malaga i le vaiaso fou e tiute i O la'u masaga ua maua sikolasipi e o ai i Fiti. Ae aumai loa ta vai tamaitai, leaga ua leva le aso, ua lagona foi le vaivai.

Talavai 2 – Tina e ese le manaia o le mataupu mo oe! Ioa 14 : 1 & Sala 91 : 1-7

Mili : Faafetai lava, ae aumai loa ta vai, se 'i o'u alu.

Sii e le talavai 2 le Tusi Paia ma sauni e faitau.

Mili : Vaai oe tamaitai, e te le alofa lava i lo'u tagata matua. Aumai ia ta vai se'i ou alu e faatali le pasi muimuli e alu i tuā.

Talavai 2 : Tina – o le vai lea na tusi mai e le fomai - E foliga mai ua ala ona a'afia lou fatu ona o lou popole. Ioane 14 :1 “Aua le atuatuvaale o outou loto, ia faatuatua i le Atua, ia faatuatua mai foi ia te a'u”. Salamo e 91 fuaiupu 1-7. “O lē nofo i le mea lilo o iai Lē Silisili ese, e mau o ia i le paolo o Lē e ona le malosi uma lava. Ou te faapea atu ia Ieova, O lo'u malu o ia ma lo'u olo, o lo'u Atua ou te faatuatua ia te ia. Aua o ia na te laveaiina oe i le mailei a le fai manu, ma le faama'i e oti ai. E ufiufi ...*tauloto mai foi e Mili le mau.*

Mili : E ufiufi ifo o ia ia te oe i ona apaau, e faia lona faamaoni ma au tali pupuni ma mea e puipuiina ai oe. *Tagi ma tautalatala.* Auoi le Alii e, faamagalo mai lo'u faatuatua iti. Ua tele mea ua e faia mo a'u, ua faafia ona e faasaoina le ola o lau fanau ma lo'u ola mai le tele o mailei, ae o lea ua ou toe masalosalo i lau puipuiga.

Savali mai Talavai 2 ma solo mata o Mili ma fusi atu.

Mili : Faafetai lava tamaitai mo le fautuaga. E moni a oe. Ua toe maua foi se faaopoopoga malosi. Tofa loa.

Talavai 2 : Tofa loa tina. Aua la ia e te toe popole!

Ulufafo Mili. Savali mai i le itu –faafeagai le teine tausima’i pasi. Faasolo lana vaai i le laupapa ma valaau.

Teine tausima’i pasi : Tili Selu?

Tili : Lea! Talotalo lona lima i le teine tausima’i pasi. Se’i ese le matatiota ma tuu i lana tamai ato. Se’i mai i fafo le vali laugutu. Toe vali ona laugutu.

Tina X : faasaga ia Tili. Amuia oe Tili, e te aulelei ma e maloloina. E tu lelei foi lou aiga, ma o lena e faatonusili lou to’alua i le Ofisa o Vaomatua. Ailoga e iai se mea e faaletonu ai fua lou soifua maloloina. Ae tusa fo’i pe faaletonu lou fatu o lena e lava au tupe e fai ai sou taotoga. E le pei o matou.

Tili : (faliu ma ata ia Tina X) Se’i o keine sasa’o e siaki o lakou faku.

Punou pea i ana faila le alii fomai. Ua lilo le tino o Tili i le pupuni ona tilotilo lea o le alii fomai i le pupuni mo sina taimi puupuu ma faanunumi lona muaulu. Ua aumai i ai le pepa faata e le teine tausimai pasi. Ua nofo le alii ma matamamata i le ata o i le pepa faata, ua ia lulu le pepa ma sisi i luga atu ma vaavaai i ai. Ona tuu lea i luga o le laulau ae tusi i lalo le faamatalaga o le faata. Ua faamau foi i lalo vailaau e aoga mo le togafitiga o le ma’i. Ona tauaao lea i le ma’i. Ua faasino le ma’i i le laulau o lo o tusi ai le igoa TALAVAI

Talavai 3 : malo le soifua!

Tili : Mo le a? La’u pepa kalavai lea e ui iga ou ke le lagoga se ma’i. E mafai oga faavave mai a’u fualaau?

Talavai 3 : lelei. Luka 12:15 “... e le ola se tasi i le tele o ana mea.” Mare 7:20-23. O le mea e sau mai totonu o le tagata e leaga ai o ia, aua e alu a’e mai le loto o le tagata le manatu leaga, o le amio leaga, o le mataua, o upu leaga, o le faamaualuga, o le lē mafaufau.

Tili : O le a le mea ua e lauga mai ai ia ke a’u, ae le aumaia a’u fualaau?

Talavai 3 : susu’e le patua o le pepa e leai se faamatalaga ma faitau “Amuia e loto mama, aua latou te iloa atu le Atua”.

Tili : Ia ua lava loa lega!

Ulufafo Tili, ae taatia lana pepa talavai i luga o le laulau. Piki i luga e Talavai 4.

Talavai 4 : Ata. Suga e leai se mea o tusi i le patua o le pepa.

Talavai 3: Ha ha! Se’i fai fo’i sa’u taumafaiga latou. Ua ova lava le fia o si tamaitai faatoa alu atu nei.

Tau fai talie Talavai e toalua.

Teine Tausi Ma'i pasi : *tilotilo i lana lisi Eseta Onosa'i ?*

Eseta : O a'u lenei.

Teine Tausi Ma'i pasi : Susu mai mo lau faata.

Eseta : Ua lelei faafetai. *Savali i tua o le pupuni mo le faata.*

Tina faiaoga :O si fafige le la lea ga faga e le kagaka loga koalua, a ea?

Tina faatauoloa : i, o le la – Sa a'oa'o fesoasoani si oga ko'alua. Ga alu aku si kamaloo e asiiasi i le Aso Koogai i le fale o le isi aiga, ae o le la e kuu pusa a lakou maliuaga. Fai mai e faukua aku i ai si a'oa'o fesoasoagi e koe fo'i mai i le loku, ae gofo le alii se'i a'e laga faga pei o se kama o se aka ma faga le kamaloo.

Tina faiaoga: Kalofa e, e ese le kamalii o si kamaloo ua maliu.

Tina faatauoloa: Faapega fo'i si fafige le la. Ga ou faalogo fai mai ga faamagalo e si fafige le kamaloo ga faga loga koalua i le kaimi ga fai ai laga molimau.

O loo tilotilo le alii fomai i le pupuni. Ua aumai i ai le pepa faata e le teine tausimai pasi. Ua nofo le alii ma matamamata i le ata o i le pepa faata. Ona tuu lea i luga o le laulau ae tusi i lalo le iuga o le faata. Ua faamau foi i lalo vailaau e aoga mo le togafitiga o le ma'i. Ona tauaao lea i le ma'i. Ua faasino le ma'i i le laulau o lo o tusi ai le igoa TALAVAI. O lo o saofafa'i ai ni tina.

Talavai 4 : malo le soifua!

Eseta : Malo fo'i galulue ia te oulua faletua. *Tauaao le pepa i a Talavai 4.*

Talavai 4 : *Tilotilo i le pepa.* Manaia tele. Mataio 5:4, 10 Amuia e faanoanoa aua e faamafanafanaina i latou.” “Amuia e sauaina ona o le amiotonu; aua e o latou le malo o le lagi.”

Eseta : *Amata ona maligi loimata. Aapa i le ato ma aumai ai le solosolo e solo ai ona mata.* Faafetai mo upu faamalosiau. E taua ia te a'u aua tatou te le masani ae o lena e fetai tonu lava a lua faamatalaga ma le tulaga o lo o ou iai. Na o le Atua lava e mafai ona faaalua atu na mea i le tou ofisa. Viia le Atua. Faafetai tele lava ia te oulua ma le tou ofisa mamalu.

Talavai 4 : E le afaina tina. O vae lava ma lima nei aua le tautuaina o le atunuu.

Eseta : Manuia tele galuega o totoe o lenei aso. Maua so lua malosi e faaauauina ai lenei tautua taua. Tofa ia.

Talavai 4 : Ia manuia foi oe tina. Soifua ia.

Savali mai i le itu –faafeagai le teine tausima’i pasi. Faasolo lana vaai i lana lisi ma valaau.

Teine tausima’i pasi : Lote Salamō (as in repentant)

Lote : o a’u lea. Tua o le pupuni? *Lue mai le ulu o le tamaitai tausi mai pasi.* Ua lelei, faafetai.

Lote : *Soso i luma.* Pei ua ta fefe ea ta te alu e faata ta ita. Nei te’i ua iloa mai mea ia e i totonu o lota loto.

Tina e sosoo ai? : O a mea? Na ou fai atu faafia ia te oe, aua e te toe mafaufau i mea ua tuana’i. Vaai o lena ua avea oe ma faiaoga Aso Sa, ua fai ma faataitaiga lelei i fanau a le ekalesia, o si ou aiga fo’i o se tagata kerisiano tele, na fai foi lana tautinoga e le amanaia e ia mea ua tuanaia aua e alofa tele ia te oe. Vaai oe Lote, e leai ma se isi o le tatou nuu e lē iloa le lua faamaoni i mea e fai a le ekalesia aemaise ai foi galuega ua filifilia ai oulua.

Lote : Ioe, ae iai lava taimi ou te toe mafaufau ai i le mau sese na ‘ou ui mai ai, ma ou faalogo foi i tala a tagata e le iloa ua ou sui, ona ou toe tiga ai lava lea.

Tina e sosoo ai? : Aue e! Alu ia o le la e faatali mai le fomai.

Punou pea i ana faila le alii fomai. Ua lilo le tino o Lote i le pupuni ona tilotilo lea o le alii fomai i le pupuni mo sina taimi puupuu. Ua aumai i ai le pepa faata e le teine tausimai pasi. Ua nofo le alii ma matamamata i le ata o i le pepa faata. Ua tusi i lalo le iuga o le faata. Ua faamau foi i lalo vailaau e aoga mo le togafitiga o le ma’i. Ona tauaao lea i le ma’i. Ua faasino le ma’i i le laulau o lo o tusi ai le igoa TALAVAI.

Talavai 5 : Malo le soifua

Lote : Faamalo atu foi, i le tou ofisa mamalu. Malo le onosa’i. La ta pepa lea faamolemole!

Talavai 5 : Talofa e, ta’i manaia lau mataupu?

Lote : Mataupu poo fualaa?

Talavai 5 : Mataupu. Sala 32:1, 2. Amuia le tagata ua faamagaloina lana solitulafono, ma ua ufitia lana agasala. Amuia le tagata e le tausalaina e Ieova, e leai fo’i se oleolega i lona loto. Filipi 3 : 13. “ou te faagalogalo i mea ua tuana’i, ou te momo’e punoua-a’i foi i mea o lumana’i.

Lote : Faafetai lava. Ae a ata vai?

Talavai 5 : Tina, o le tele o isi tagata mama'i na o mai analeila i le taeao, na mafua ona gasegase ona o le lē loto faamagalo. E mafai foi ona e afaina pe afai e te lē famagaloina lou lava tagata. Ma aua le popole fua i manatu o isi tagata e taumafai e faaleaga lou tagata. Mafaufau oe ia i le Atua.

Lote : Faafetai tele lava mo fautuaga e ui e ese fualaa na ou manatu o le a maua. Ae o lea ua sili atu ai lea. Faafetai lava.

Talavai 5 : E le afaina, ae sau loa e alu. A iai lava se isi mea, asiasi mai.

Lote : faafetai lava. Tofa ia.

Ulufafo Lote. Talanoa leo tetele tina o lo o pito i luma o le laina.

Tigaina Mafatia : *i le tina e sosoo.* E, ua sau foi le fefe latou.

Seini Lotu : aisea e te fefe ai. O tagata lelei e pei o oe, e onosa'i, e toaga i le lotu, faamaopopo mea i galuega a tina, e le inu pia, le taa, ma isi vaega uma na, e le tataua ona faaletonu fatu.

Tigaina Mafatia : E, matuai e taufaasee tele. Ae iai lava le mea lea e mamafa ia te a'u. E faigata ai lava ona ou moe.

Seini Lotu : O le a lena mea ua faafatu'ulu i lou mafaufau? Ou te ofo, a o oe lava e taulamua i galuega a le ekalesia, ma e toaga mai i fono tatalo, e alofagia oe e matua o lou toalua ae o lena lava e te fealua'i ma lena avega. Leitioa la ou vaai atu ia te oe, pei e te le fiafia.

Tigaina Mafatia : O isi taimi ua ta le iloa poo ai a o ta talanoa i ai. O a'u -ua lagona lava lou lē leva i le aiga o lo'u toalua. Ou te le o fai atu ou te musu e fai feau a le toeaina ma le olomatua, ae e iai isi taimi ta te faalogo atu ai pei o le puni la ta manava i le lē alolofa o isi tagata o lea aiga. Ua amata fo'i ona ou mataumea i isi taitoalua o uso o le matou aiga. E tau valaau lava e o atu e fai feau a le toeaina ma le olomatua. E leai lava se isi e nofo nofo savalivali atu ma se falaoa. A leai lava ma'ua e le fafagā le toeaina ma le olomatua. E oo foi i a latou fanau e 'alo'alo mamao lava pe 'a valaau atu e lomi vae o si olomatua. Pei lava matou te le o nonofo faatasi. Na o le tau mateletele mai o le matou aiga ia te a'u i le vave o le alu o le seleni, ae o'u faamatala i ai o lea e fafaga uma e maua le aiga atoa, e aofia ai ma isi tagata o lo o faigaluega lelei.

Seini : oka matua lē mafaufau na tagata se. Talofa e ia te oe ma si ou to'alua. Suga lou igoa le la ua valaau mai.

Punou pea i ana faila le alii fomai. Ua lilo le tino o Tigaina i le pupuni ona tilotilo lea o le alii fomai i le pupuni mo sina taimi puupuu. Ua aumai i ai le pepa faata e le teine

tausimai pasi. Ua matamamata le alii i le ata o i le pepa faata. Ona tuu lea i luga o le laulau ae tusi i lalo le iuga o le faata. Ua faamau foi i lalo vailaau e aoga mo le togafitiga o le ma'i. Ona tauaao lea i le ma'i. Ua faasino le ma'i i le laulau o lo o tusi ai le igoa TALAVAI.

Talavai 6 : Lau pepa tina.

Tigaina : Lea, faafetai lava.

Talavai 6 : 1 Tesalonia mataupu e 3 fuaiupu e 13. “ A o outou le au uso e, aua ne'i outou faavaivai i le amio lelei.” Esoto 20: 12. “Ia e ava i lou tama ma lou tina, ina ia faalevaleva ai ou aso i le nuu o le a foaiina mai e le Atua ia te oe.”

Tigaina : Faafetai mo mau mai le Tusi Paia. E faapefea ona iloa e le foma'i mea o loo tutupu i lo'u olaga?

Talavai 6 : Ou te iloa lava o lo o faalagolago le alii foma'i i le Foma'i o foma'i. O lana tala lava lena ia matou. Fai mai le alii o le tele o gasegase e maua ai tatou e mafua ona o le lē loto faamagalo o tagata poo le soona popole vale.

Tigaina : aemaise ai lava le lē loto faamagalo a ea?

Talavai 6 : e sa'o lelei. Leitiaoa fai mai le Tusi Paia “Aua ne'i goto le la o ita pea” aua o lo o silafia lelei lava e le Atua e afaina ai i tatou pe a tauave se a'a oona, poo le lē loto faamagalo.”

Tigaina : Oka oka se aoga o lenei aso mo a'u. Ua ou maua se faamalosi'au matautia i lenei aso mai ni tagata ou te le masani ai. Na o le Atua lava e mafai ona fa'ailoa mea faapena. *Lulu aao ma talavai 6.* Se faafetai tele lava. Faamanuia tele le Atua i lo outou ofisa.

Talavai 6 : Tofa ia.

Tau fai sioa pea tina galulue i le fale talavai ao alu ese Tigaina. Ua leai ni isi o totoe i le itu o iai le faaata ma le nofoaga sa faatali ai le au gasegase...

Talavai 6 : ia 7. E leai lava se mea e lē uma. Lea ua o uma tagata ae tau o taua lea e totoe. Faamālō atu ia te oe le uso mo galuega o lenei aso.

Talavai 7 : Faamālō atu fo'i ia oe. *Amata ona teu le laulau ma faamamā le ofisa.* O 'ē matau'a, e iai a'oa'oga taua o loo maua mai i talavai o lo o aumai a tagata?

Talavai 6 : Ae a. O le toatele o tagata e foliga mai o lo o malolosi ma tu lelei o latou aiga, ae o lo o feoa'i ma avega mamafa.

Talavai 7 : E ese le toatele o le au tala vai na fautua i ai le foma'i i le taua o le mamā o le loto? Ia mamā mai le lē loto faamagalō e o'ō lava i le lē faamagalōina o oe lava, le loto popole, le loto faamaualuga ma isi.

Talavai 6 : Ioe ma le loto faanoanoa, le loto pala'ai, ma le loto tigā. Ae ua faatau le loto tele, le lē tauī ma sui, le loto alofa, le ava ma le loto maualalo.

Talavai 7 : E te iloa o mea nā, na faatau mai, o loo ta'ua e le Tusi Paia o le Fua o le Agaga.

Talavai 6 : Sa'ō lelei. E maua i le Kalatia 5: 22, 23. Faatali se'i su'e atu : "A o le fua o le Agaga o le alofa, o le olioli, o le filemu, o le onosa'i, o le mataalofa, o le agalelei, o le faamaoni, o le agamalu, ma le lē gaōiā; e lē faatulafonoina mea faapea".

Talavai 7 : O le mea lea e lelei ai mea a le Atua a ea? E manuia le tagata na sau e talavai, manuia le alii fomai ae lavea atu ai ma taua.

Talavai 6 : Ioe, le ituaiga manuia e lē maua i se isi mea o lenei lalolagi. E lē mafai e tupe ona faatau. E maua ai le filemu ma faafou ai le malosī e toe tamoe punoa'i ai ma faagalo mea ua tuana'i.

Talavai 7 : Tafefe ia taua, ua tataua ona ta o e su'e i Malua/Kanana Fou.

Talavai 7 & 6 : *talie faatasi, uu a la ato ma tau fai savavali ese.*

TOSO LE PUPUNI.